

輿地廣記卷第十九

河東路下

望汾州春秋屬晉戰國屬趙秦屬太原郡二漢屬太原西河二郡魏因之晉屬西河國元魏置西河郡兼置汾州北齊置南朔州後周改曰介州隋開皇初郡廢大業初州廢復置西河郡唐武德元年改曰浩州三年改曰汾州 皇朝因之今縣五望西河縣本漢隰城屬西河郡東漢省之晉復置屬西河國元魏爲西河郡及汾州治隋唐皆因之肅宗上元元年改隰城曰西河漢京陵縣地屬太原郡卽趙文子與叔向觀于九原之所漢茲氏縣屬太原郡魏黃初二年置西河國有西河恭王司馬子盛碑

望平遙縣本漢平陶縣屬太原郡東漢晉因之元魏以諱改陶爲遙隋屬西河郡唐屬汾州

地十九

河東路下

一

上介休縣二漢屬太原郡晉屬西河國元魏分置平昌縣後周置介休郡省介休縣入平昌隋開皇初郡廢十八年改平昌曰介休屬西河郡義寧元年復置介休郡唐武德元年改爲介州正觀元年州廢來屬有縣上山今謂之介山有介子推祠漢鄆縣屬太原郡東漢晉因之九澤在北是爲昭餘祁漢中都縣文帝爲代王都此屬太原郡東漢晉因之後皆入介休

上孝義縣本漢中陽縣屬西河郡東漢因之隋曰永安正觀元年更名孝義有隱泉山

中靈石縣本漢介休縣地隋開皇十年置屬汾州唐因之有賈胡堡唐高祖討宋金剛次於此地有高壁嶺雀鼠谷汾水關皆險固之處

上澤州春秋屬晉戰國屬韓後屬趙秦屬上黨郡二漢屬上黨

河東二郡魏晉因之元魏置達州及高都長平安平三郡北齊置長平高都二郡後周併二郡爲高平郡隋開皇初郡廢改州爲澤州大業初州廢置長平郡置澤州天寶元年曰高平郡皇朝因之統縣六

緊晉城縣本高都縣二漢晉屬上黨郡元魏置建州北齊置長平高都二郡後周併爲高平郡隋開皇初郡廢十八年改縣爲丹川大業初置長平郡唐武德元年置建州三年析丹川縣置晉城六年州廢隸蓋州徙蓋州來治九年省丹川入晉城正觀元年州廢隸澤州徙澤州來治有天井關在縣南太行山上

上高平縣本泫氏縣地二漢晉屬上黨郡後析置平高縣北齊改曰高平省泫氏入焉隋屬長平郡唐武德元年置蓋州正觀元年州廢屬澤州秦將白起坑趙降卒四十萬人於長平

地十九

河東路下

二

卽此地今有頭顱山

上陽城縣本濩澤縣二漢屬河東郡晉屬平陽郡隋置澤州取濩澤爲名後屬長平郡唐武德元年復置澤州八年徙治端氏天寶元年改縣爲陽城有禹貢析城山王屋山濩澤水

中端氏縣韓趙魏旣分晉徙晉君於端氏卽此二漢屬河東郡晉屬平陽郡元魏置安平郡隋開皇初郡廢屬澤州唐武德六年徙州來治此正觀元年徙治晉城

中陵川縣本漢泫氏縣北齊省之隋開皇十六年置陵川縣屬澤州唐武德元年屬蓋州正觀元年來屬

中下沁水縣二漢晉皆屬河內郡元魏置廣寧郡北齊郡廢改縣爲永寧隋開皇十八年復爲沁水屬澤州唐武德元年屬蓋州正觀元年來屬

中憲州自唐以前地理與嵐州同本樓煩監牧以嵐州刺史兼

領正元十五年別置監牧使龍紀元年節度使李克用表置憲州及樓煩縣 皇朝因之咸平五年以樓煩屬嵐州以嵐州之靜樂來屬熙寧三年州廢十年復置統縣一

中靜樂縣漢汾陽縣地屬太原郡後置岢嵐縣隋開皇十八年改曰汾源大業四年又改爲靜樂屬樓煩郡唐武德四年置管州六年州廢以靜樂屬嵐州 皇朝咸平中來屬熙寧三年屬嵐州十年復來屬有管涔山汾水所出有隋汾陽宮故天池縣唐龍紀三年置屬憲州咸平中省入靜樂

下嵐州春秋屬晉後爲胡地有樓煩王居焉其後屬趙秦屬太原郡二漢晉因之後魏末置嵐州隋大業四年置樓煩郡唐武德四年置東會州六年更名嵐州 皇朝因之統縣三

中宜芳縣本漢汾陽縣屬太原郡高帝封斬彊爲侯國積粟所在謂之羊腸倉有羊腸坂石磴縈回若羊腸焉隋末置嵐城

地十九

河東路下

三

縣屬樓煩郡唐武德四年更名宜芳六年爲嵐州治有古秀容城魏土地記曰秀容胡人徙居之立秀容護軍治此

中下合河縣北齊置蔚汾縣隋大業四年改曰臨泉屬樓煩郡唐武德三年改曰臨津六年屬嵐州正觀元年又改爲合河東有蔚汾關西有合河關

下樓煩縣唐龍紀元年於樓煩監西一里置爲憲州治

皇朝咸平中以縣來屬

下石州戰國時趙之離石邑後爲秦魏二國之境秦屬太原郡地漢屬西河郡東漢爲郡治焉晉置西河國北齊置西汾州及懷政郡後周改州爲石州郡爲離石郡隋開皇初郡廢大業初州廢復置離石郡唐武德元年復爲石州天寶元年曰昌化郡皇朝因之統縣三

中離石縣本戰國趙邑秦昭王伐趙取離石是也後屬太原郡

漢屬西河郡而東漢徙郡治此晉爲西河國治自漢末匈奴入居內郡魏武帝分其眾爲五部在離石者以左賢王去卑監之去卑子豹豹子淵世據此地謂之左國城晉惠帝時淵起兵於此後趙石勒置永石郡後縣廢焉北齊置昌化縣及懷政郡後周郡縣並改曰離石隋因之唐爲石州

中平夷縣後周析離石縣置隋屬離石郡唐屬石州

中方山縣後周置窟胡縣及窟胡郡隋開皇初郡廢後縣改爲修化屬離石郡後周又置廬山縣大業初并入修化唐爲方山縣武德二年置方州三年州廢來屬按舊史言方山隋縣隋史石州無方山有修化豈隋末更名而史官失紀歟有方山赤洪水

下遼州春秋屬晉戰國屬韓後屬趙秦二漢屬上黨郡晉爲樂平郡後魏爲遼陽郡隋屬遼州大業初州廢屬太原郡唐武德

地十九

河東路下

四

三年復屬遼州六年州徙來治此八年曰箕州先天元年改曰儀州天寶元年曰樂平郡中和三年復曰遼州 皇朝因之

熙寧七年州廢屬平定軍元豐八年復置今縣四

下遼山縣本涅氏縣地二漢屬上黨郡晉置遼陽縣屬樂平郡元魏曰遼陽北齊省之隋開皇十年復置更名遼山十六年屬遼州大業初州廢屬太原郡唐武德三年復屬遼州六年州治徙此有遼陽山古箕城春秋晉人敗狄于箕先軫死焉卽此

中下榆社縣本涅氏縣地二漢屬上黨郡晉置武鄉縣唐武德元年屬韓州三年以縣及并州之平城置榆州六年州廢來屬

下平城縣

下和順縣本韓之閼與邑趙奢破秦軍於閼與卽此漢爲沾縣

屬上黨郡後置梁榆縣晉盧諶征艱賦云訪梁榆之虛郭乃
闕與之舊平是也隋開皇十年改曰和順屬太原縣唐武德
三年來屬熙寧七年省爲鎮入遼山元祐元年復置

下豐州自五代以前地理與府州同 皇朝嘉祐七年以府
州薤泊川掌地置東南接府州西接麟州不統縣

同下州威勝軍自五代以前地理與潞州同 皇朝太平興
國二年置威勝軍併沁州入焉今縣四

中銅鞮縣本晉大夫羊舌赤之邑漢高帝破韓王信於此縣二
漢及晉屬上黨郡隋唐屬潞州 皇朝爲威勝軍有舊涅

縣後魏改爲陽城開皇十八年改爲甲川大業初省入銅鞮
上武鄉縣漢涅縣地晉置武鄉縣屬上黨郡石勒其縣人也有

漚麻池勒與李陽爭池相毆卽此及僭位置武鄉郡後魏去
武字隋開皇初郡廢屬潞州十六年分置榆社縣大業初省

地十九

河東路下

五

入唐武后復加武字屬潞州 皇朝太平興國二年來屬

中下沁源縣本穀遠縣二漢屬上黨郡晉省之元魏置沁源縣
及義寧郡隋開皇初郡廢十六年置沁州大業初州廢屬上
黨郡唐武德元年復置沁州天寶元年曰陽城郡 皇朝

太平興國六年廢州以沁源來屬

中下縣上縣隋開皇十六年分介休縣之南境置屬汾州唐武
德元年屬沁州 皇朝太平興國六年屬大通監寶元二
年來屬晉文公以縣上爲介之推田曰以志吾過且旌善人
卽此

同下州平定軍春秋屬晉戰國屬趙秦及二漢屬太原上黨二
郡晉置樂平郡元魏爲西陽郡後復爲樂平隋開皇初郡廢十
六年置遼州大業初州廢屬太原縣唐武德三年復置遼州治
樂平領遼山平城石艾等縣後州徙治遼山而樂平石艾還屬

并州 皇朝太平興國二年置平定軍今縣二

中平定縣本上艾縣漢屬太原郡東漢屬常山國晉屬樂平郡
後改曰石艾隋屬太原郡唐武德三年屬遼州六年屬受州
八年州廢屬并州天寶元年改曰廣陽 皇朝太平興國
四年改曰平定置平定軍

中樂平縣本沾縣二漢屬上黨郡晉置樂平郡元魏北齊後周
皆因之隋開皇初廢郡爲樂平縣屬太原郡唐武德三年以
縣置遼州六年徙治遼山而樂平屬并州 皇朝太平興
國四年來屬

同下州岢嵐軍自五代以前地理與嵐州同 皇朝太平興
國四年析置岢嵐軍今縣一

下嵐谷縣唐長安三年析宜芳縣置屬嵐州并以岢嵐柵爲軍
景龍中張仁亶徙其軍於朔方留者號岢嵐守捉隸大同軍

地十九

河東路下

六

皇朝復以縣置軍有岢嵐水岢嵐山

同下州寧化軍自五代以前地理與嵐州同 皇朝太平興

國四年析嵐州地置寧化縣五年於縣置軍領寧化一縣熙寧
三年縣廢後復置崇寧三年又廢有雪山汾水

同下州火山軍自五代以前地理與嵐州同 皇朝太平興

國七年以嵐州雄勇鎮置軍治平七年置火山縣四年縣廢有
火山黃河

同下州保德軍自五代以前地理與嵐州同 皇朝淳化四
年析嵐州地置定羌軍景德二年改曰保德不領縣有黃河

同下州晉寧軍自五代以前地理與石州同

中下臨泉縣後周置曰烏突及置烏突郡隋開皇初郡廢縣尋
改曰太和屬石州唐武德三年改縣曰臨泉置北和州正觀
三年州廢屬石州有湫水 皇朝置軍來屬

中定胡縣漢離石縣地後周置及置定胡郡隋開皇初郡廢屬石州有孟門關其地險固

河東路化外州

單于大都護府本戎狄地戰國屬趙秦漢屬雲中郡魏晉皆屬新興郡隋屬榆林郡唐龍朔三年置雲中都護府麟德元年改爲單于大都護府升振武軍節度東北至朔州南至勝州領縣一

中金河縣唐天寶四年置有金河有燕然山東漢竇憲勒銘於此有李陵臺有王昭君墓名曰青冢唐咸通中李國昌爲節度使恣橫拒命而子克用盜據雲州侵掠代北爲邊患焉安北大都護府唐龍朔三年立曰瀚海都督府總章二年更名開元二年治中受降城十年徙治豐勝二州之境十二年徙天德軍領縣二

地十九

河東路化外州

七

中陰山縣故北戎之地陰山東西千餘里草木茂盛多禽獸匈奴依岨其中治弓矢出來爲寇是其苑囿也戰國屬趙趙武靈王築長城自代並陰山下至高闕爲塞秦始皇斥逐匈奴自榆中並河以東屬之陰山以爲三十四縣漢初復爲匈奴所有武帝出師征伐斥奪此地置陰山縣屬西河郡匈奴失陰山過之未嘗不哭東漢省入西安陽屬五原郡唐天寶元年置陰山縣

上通濟縣

鎮北大都護府唐立領縣二

上大同縣

上長寧縣

下都督雲州本戎狄地戰國屬趙秦屬鴈門定襄代三郡二漢晉因之後魏道武帝徙都平城置司州代尹孝文帝遷都洛陽

改代尹曰萬年尹隋屬馬邑郡唐武德四年置北常州七年州廢正觀十四年置雲州天寶元年曰雲中郡升大同軍節度領縣一

上雲中縣本平城縣地漢晉屬鴈門郡後魏以爲代都北齊置太平縣後周改曰雲中隋開皇初改曰雲內屬馬邑郡唐正觀十四年自朔州北定襄城移雲州於雲內之常安鎮置因改雲內爲定襄縣永淳元年爲默啜所破州縣俱廢開元二十年復置改定襄曰雲中有故陰館縣漢屬鴈門郡東漢爲郡治後魏置平齊郡尋廢有故高柳城漢屬代郡東漢爲郡治有參合陂漢屬代郡韓王信反與胡騎入居參合柴將軍屠參合斬信於此有故桐過城二漢屬定襄郡有故武進城漢屬定襄郡東漢屬雲中郡有故盛樂縣漢曰成樂屬定襄郡東漢屬雲中郡後魏昭成徙居盛樂宮卽此有白登山匈奴

地十九

河東路化外州

八

奴圍漢高帝於此有單于臺漢武帝出長城登單于臺勒兵十八萬騎旌旗徑千餘里威震匈奴卽此

望應州唐末置後唐天成元年升彰國軍節度領縣二

望金城縣後唐明宗其縣人也故置彰國軍而以金城爲望縣

上混源縣

上新州唐末置後唐同光二年升威勝軍節度領縣四

中永興縣

礬石縣

龍門縣

懷安縣

下蔚州本代地在常山之北趙簡子與諸子約曰吾藏寶符於常山上先得者賞諸子馳之常山無所得毋卹還曰已得符矣從常山上臨代代可取也於是簡子以毋卹爲賢其後繼立是

爲襄子襄子北登夏屋請代王使廚人以銅斗擊殺之遂發兵定代地及武靈王置代郡秦及漢晉皆因之後魏置懷荒禦夷二鎮及靈丘郡後周置蔚州隋開皇初郡廢大業初州廢屬鴈門上谷二郡唐武德六年置蔚州天寶元年曰安邊郡至德二載曰興唐郡統縣三

中下靈丘縣有趙武靈王墓因以爲名漢屬代郡東漢省之後魏復置及置靈丘郡後周置蔚州隋屬鴈門郡唐初沒於突厥武德六年置蔚州僑治陽曲七年僑治繁峙八年僑治秀容故北常州城正觀五年破突厥復故地還治靈丘有滹水發源於高氏山東入河漢志注以爲靈丘之號在趙武靈王之前此說非也齊地別有靈丘孟子謂蚺鼃辭靈丘而請土師是也此靈丘在趙之北境非齊趙交兵之地

中興唐縣本安邊縣唐開元十二年置治橫野軍至德二載更

地十九

河東路化外州

九

名興唐

下飛狐縣本廣昌縣漢屬代郡東漢省之晉復置隋仁壽初改曰飛狐屬上谷郡唐屬蔚州有飛狐谷飛狐關在代國南四十里漢酈食其說高帝所謂距飛狐之口是也晉劉琨爲胡人所攻自代出飛狐口奔於安次卽從此道

下朔州本戎狄地戰國屬趙秦漢屬代鴈門二郡靈帝末羌胡天擾定襄靈中五原朔方上郡之民並流徙分散建安二十年魏武帝始集塞下荒地置新興郡晉惠帝改曰晉昌郡後魏置懷朔鎮及朔州北齊置廣安郡隋開皇初郡廢大業初州廢置代郡尋改爲馬邑郡唐武德四年復曰朔州統縣二

中善陽縣本劇陽縣漢屬鴈門郡王莽改曰善陽東漢復曰劇陽晉省之北齊置招遠縣及廣安郡隋開皇初郡廢改縣曰善陽置代郡尋曰馬邑唐置朔州有故桑乾縣二漢屬代郡

後魏置桑乾郡北齊改爲廣寧郡後周廢之有秦馬邑城晉太康地記云秦時建此城城輒崩不成有一馬周旋馳走反覆父老異之依以築城城乃不壞遂名馬邑漢武帝使聶壹翁佯爲賣馬邑城以誘匈奴單于信之乃以十萬騎入武周塞覺漢兵謀引去卽此地也二漢及晉屬鴈門郡故武州縣

中馬邑縣唐開元五年析善陽置治大同軍城

下寰州唐末置領縣一

下寰清縣

下儒州唐末置領縣一

下縉山縣

下毅州本武州唐末置後唐長興元年改曰毅州領縣一

下文德縣

地十九

河東路化外州

十

輿地廣記卷第十九